

Arkitekto Serge Theysen, Arkitekto di facilidad multi-funcional di Savaneta:

Hopi Entusiasmo cu Reconocimento como Profesional Hoben di Savaneta

CU e idea su tras pa trece un facilidad mas efectivo pa e personal, mas comodo pa e clientenan y mas multifacetico pa henter e comunidad, Gabinete Mike Eman ta preparando pa den e prome semester di e añu aki cuminsa cu e construccion di Facilidatnan Multi-Funcional cu lo bin pa reemplaza e Hulpbestuurskantoornan cu ta conoce actualmente. Diahuebs ultimo personal di e oficina auxilia na Savaneta a haya un presentacion cu tabata den man di Prome Minister Mike Eman, como tambe e arkitekto encarga cu e FMF di Savaneta, Serge Thijzen. E idea ta pa proximo añu tur cinco Facilidat Multi Funcional lo ta cla.

Caminda cu tabata posibel, gobierno a purba di trahe e FMF nobo na e mesun tereno cu e HBK. Den e caso di Savaneta, esey no tabata posibel, pesey e Facilidat Multi Funcional di e distrito aki lo re aloca pa un tereno mas grandi ubica patras di e stacion di gasolin di Valero. Otro aspecto cu gobierno a pone enfasis riba dje ta pa cada FMF refleha e identidad di e barío caminda e ta. Dor di esey, Gabinete Mike Eman a

acerca arkitekto Serge Thijzen cu a nace, lanta y biba den Savaneta pa diseña e edificio. Den e caso di Savaneta, e arkitekto a inspira den lama, piscamento. Thijzen ta forma parti di e compania di arkitektura Thijzen Engineering Consultancy. Durante un encuentro cu prensa, y despues di a duna su presentacion na e personal di e HBK, e arkitekto a splica cu e ta sinti hopi orguyoso cu Gobierno a scoge nan pa realisa e proyecto innovativo y creativo; un proyecto cu hopi exigencia pero cu nan a logra cumpli cu tur. Ademas di fungi como sede pa e servicionan di custumber manera documentonan di Censo y pago di recibonan di utilidad y SIAD, lo bin oficianan adicional di gobierno pa amplia e gama di servicio brinda na e ciudadano di e barío. Otro aspecto importante encarga na e arkitekto tabata pa e edificio ta auto suficiente. “Gobierno kier pa e ta un luga sostenibel,” Thijzen a indica. Nan a logra esey dor di aplica den e diseño sistemanan di generacion di energia alternativo, reciclahe di awa y construccion cu material di avance tecnologico. Durante e presentacion na em-



pleadonan di HBK Savaneta a papia di palapa of gazebonan rond di e edificio cu lo tin funcion dobel como base pa panelnan solar cu lo genera e electricidad cu e edificio mester. Tambe lo tuma e awa cu e sistema di airco ta produci y recicla esaki pa muhamento di mata, pero tambe pa bolbe fria e facilidad. Por ultimo, y hopi interesante, tin intencion pa uza un bloki nobo cu ta percura pa wanta e cayente pafo di e edificio, loke tambe lo baha e consumo di electricidad pa

hacie fresco paden. E arkitekto a bisa cu “E mantencion lo ta hopi mas abou di loke mester.” Otro aspectonan cu tambe a tene cuenta ora di diseña e FMF di Savaneta tabata pa e edificio ta visibel y atractivo pa esunnan cu ta riba e caminda grandi. E facilidad lo tin suficiente areanan berde cu e comunidad por haci uzo di nan ki ora cu nan kier, como tambe un parkeerplaats espacioso y acceso facil pa esunnan cu incapacidad of limitacion fisico.

Finalmente, y despues di a consulta cu e clientenan di e HBK mes y tambe hobenan di e barío, a inclui den e proyecto espacionan destina pa reunion cu lo ta na disposicion di organisacion y clubnan local, escenario pa presentacionnan publico como tambe un biblioteca digital y luga caminda hobennan por siña y haci les. E vision di Gabinete Mike Eman ta pa e Facilidatnan Multi Funcional bira un punto di servicio, pero tambe di encuentro y convivencia pa e barío.